

Di 32 edicion di Festival di Buki pa Mucha ta bay tuma lugha dia 3 di november

Pa 3or di atardi di dia 3 di november, Cas di Cultura ta bay habri su portanan unda librerianan ta bay ta presente y pa 4or e show mes di e festival cu e tema di e aña aki “Dushi Cablesura” lo cuminsa.

Den cuadro aki, Biblioteca Nacional Aruba a informa cu Escritora di buki pa mucha Liliana Erasmus a skirbi un buki pa tur mucha na Aruba y Danielle Schothorst a ilustra esaki masha bunita mes. Un buki unico, dibertido y yen di aventura cu ta surpasa tur expectativa cu ‘Aza y e portanan magico’.

Esaki ta buki pa tur mucha na Aruba pa motibo cu e ta skirbi na Papiamentu y Hulandes. Biblioteca Nacional Aruba ta presenta e buki aki cu orguyo y alegria caminda ‘Aza y e portanan magico’ ta un produccion den cuadro di e Festival di buki pa mucha’, edicion 2024 y a keda publica pa Levendig Uitgever. Liliana Erasmus tin un pasion



grandi pa skirbimento. E ta, entre otro, escritora di buki pa mucha y contado di storia y uno hopi creativo. Biblioteca tin tur Liliana su bukinan pa e lesadornan chikito. Liliana ta activo riba tereno di promocion di lesamento bou mucha.

Danielle Schothorst a studia arte visual y ta skirbi y ilustra buki pa mucha. Danielle ta bin Aruba pa e Festival di Buki pa Mucha pa hunto cu Liliana presenta e buki nobo. Scolnan participante ta ricibi e buki como regalo y tur cli-

ente di libreria ta haya e buki aki gratis cu compra di 25 florin, tanten cu tin. Por haya e buki gratis na tur libreria ora cumpra un buki pa mucha, tanten cu tin.

Biblioteca ta organisa e Festival di Buki pa Mucha pa stimula tur mucha na Aruba pa lesa. Y biblioteca ta invita tur mucha na Aruba pa bira miembro y asina lesa hopi mas buki. Pa stimula lesamento poco mas, miembresia pa mucha y hoben ta completamente gratis.



Red Arubiano di Prensa Profesional (RAPP) ta reacciona tocante detencion di periodista

“Nos como asociacion ta boga pa trece mas guia y acuerdonan mutuo entre institutonan y prensa na Aruba”



Manera a bira conoci diamars ultimo, despues cu prensa tabata den un estado di tension henter dia pa motibo di aresto di minister demisionario Glenbert Croes, anochi a cera cu otro aresto: esun di periodista Marko Espinoza.

Video riba rednan social a circula mustrandando Espinoza na boei. Informacion cu Bon

Dia Aruba a ricibi ta indica cu motibo di e aresto tabata cu no a cumpli cu orden di autoridadnan pa stop di graba na Landsrecherche. Espinoza lo a bisa cu kier a saca potret di minister Croes cu boei na su man. Argumento di Espinoza tabata cu ta un sitio publico. Asina mes, el a keda deteni.

Pa esaki, Red Arubiano di Prensa Profesional (RAPP),

como e asociacion pa periodista na Aruba dedica na stimula e practica liber di periodismo y stimula e standard di comportacion etico y ta alinea nan mes cu e asociacion di periodista na Hulandes (Nederlandse Vereniging van Journalisten), a señala cu den caso aki, nan no ta tuma como nan tarea pa desapropa cierto publicacion of sistema di traha; tampoco nan kier di-

cidi ken por of no por eherce e trabao profesional di periodista.

Esey lo crea un drempel pa acceso liber na prensa pa tur hende, un punto di salida hancra den Aruba su Constitucion, algo cu nan ta para p’e y ta defende, esta libertad di prensa.

E detencion di un reportero diamars ultimo a limita e derecho di e periodista di colecta noticia liber, un derecho cu ta hancra den nos Constitucion y tratadonan internacional (Artikel 10 EVRM). Door di no a opta pa un acercamento menos drastico ta haci e detencion desproporcional, pa motibo cu a limita e derecho di colecta noticia liber mas cu tabata necesario, algo cu nos como asociacion ta desapropa pa motibo cu e ta mina libertad di prensa.

“P’esey nos como asociacion ta boga pa trece mas guia y acuerdonan mutuo entre institutonan y prensa na Aruba pa asina por keda eherce e trabao di periodista liber. Como

asociacion nos kier percura pa e puntanan di salida basico, e guia internacional di etica periodistico (Code van Bordeaux) y e principianan di RAPP, sirbi como base pa eherce e trabao di periodista. Na final tur medio y tur periodista tin cu carga nan responsabilidad y esaki ta pa mantene nan mes na ley, na e limitenan di sociedad y tambe na loke e mesun publico ta spera di nos.” E asociacion conforma pa Melissa Stamper, Andreina Morillo y Yorleny Oduber a indica ayera den un comunicado pa prensa.

